

四庫全書

集部

欽定四庫全書

集部
龜巢稿卷五

詳校官監察御史臣劉湄

中書臣劉源溥覆勘

總校官知縣臣楊懋珩

校對官主事臣陳文樞

謄錄監生臣張元愷

欽定四庫全書

龜巢稿卷五

元 謝應芳 撰

詩

贈邵濟民

曲塘地仙居洗藥溪水香青衣兩童子玉杵搗玄霜玄
霜搗來奉高堂老親食之壽而康天生便便貯書腹金
匱石函書爛熟東南海上多名山山中采藥騎青鹿歸
來濯足婁江水坐對青山隱烏几囊探藥物不論錢但

欲使人無病耳有時彈琴鸞鳳音有時拔筆長短吟紛
紛吮痔吮癰者徒教別屋堆黃金

聞雲門張先生慈烏軒焦尾居名賦二詩

慈烏曲

慈烏乳衆雛雛大羽翼成翩翩出巢飛啞啞繞林鳴得
食不自飽歸以飼所生紛然同類中有此骨肉情余昔
養親日瞻烏常自懲白首重相見愛之雙眼青匪謂得
所止丈人屋崢嶸為時梟獍多見烏如閔曾王孫金彈

九慎勿令畏驚

焦桐曲

焦桐製孤琴舉世稱異材往非蔡中郎竟作爨下灰七
絃繫朱絲徽金軫瓊瑰知音適相遇攜上高高臺一彈
廣陵散絕響有餘哀箏琶沸新聲瓦釜亦鳴雷天機妙
循環復見泰宇開爾桐朱鳳吟靈風揚九垓吾今洗吾
耳盤石坐莓苔

芝秀軒詩

猗歟名門夙稱五常遙遙耳孫厥德復昌於粲爾子文
藻有光如彼芝草曄曄其英自天降祥奕葉流芳匪曰
三秀仙人之粮林壑爾居竒芬遠揚雍公之扁金薤琳
瑯於昭彼蒼福善孔彰俾爾耆艾家有餘慶維來維初
永言弗忘

結茅東郭歲晚言懷

行盡難行路歸來父母邦溪山閑杖履花竹小軒牕教
子知一二抱孫成兩雙有時城府去深媿鹿門龐

二

齷齪龜巢老蕭條鶴髮秋過眉桃竹杖方領木棉裘補
世慙無術通家憶舊遊幸來雙白鳥能與共滄洲

三

靜掃蕭齋地書牀一舊羶談經難亦解迎客犬常先流
水柴門外橫山窺牖前春秋垂八十食粥了餘年

四

季子躬耕地寥寥禮讓風度遼歸老鶴遵渚集飛鴻土

姓多相雜鄉音舊不同獨憐東郭外劍井氣如虹

五

官塘人似蟻環堵室如蝸白髮三千丈清貧第一家地
爐寒撥火雪水夜煎茶好客知誰至青燈結細花

六

過客應相笑衰翁未得閒酒經方補註詩稿又重刪
蔡杖家家竹藍輿處處山數朝天色冷高卧掩柴關

七

故國歸來晚孤城草木寒親朋皆鬼籙鄉里少儒冠寫
琰金鐘失沉沙鐵戟殘譙門斜照裏時為一辛酸

八

臘月無多日春風又一年儘添頭上雪聊適筵中天彩
筆題冰柱青衣送酒船晚來賓客散清興更悠然

和陳二令遊善權洞

我昔陽羨遊春山聽茶歌別來三十載重游竟蹉跎憑
高每望碧湖外羣峰玉立青嵯峨善權山水最佳處我

公去知清興多來時風景溢吾目不用登臨勞吾足有
聲之畫勝丹青曲盡物情人歎服天開地闢羲皇前神
工為誰開洞天爾來一萬八千歲金堂玉室居羣仙飛
車鸞鶴久不見春去秋來只鴻鴈青山前度污狼煙從
此四郊荆棘遍洞前玉氣金瀾漫仙家應作瑤池觀層
巔巨石勢欲墮過者為之心膽寒翩翩石燕黏翠壁飛
來若與人相識馬如龍車如水尋常貴遊無足數以分
清致侶名縉一代風流繼支許樂哉山水三日遊忘却

世間千種愁昔人名句題玉柱今公健筆留銀鉤寄言
武陵人桃源茲可求丹砂多與鍾乳謀瑶草不知蒲柳
秋長橋無饒蛟南山無猛虎在處可遊觀政須人好古
墨圓碑篆亦奇絕似岐山石為鼓竹姑子明年春山
僧煮玉邀嘗新哦松暇日肯同去作詩更為山傳神

鄉飲酒詩

皇帝即位之五年歲在壬子詔天下行鄉飲酒禮
明年癸丑正月二日常州府太守孫公率僚屬行

之儀物品節不約不侈省部主事宋公實在賓位
僕介而下耆客凡二十七人執事者位之其登降
揖讓盥洗獻酢靡不如矩時某年七十有七亦得
以布衣廁諸賢士大夫之列蓋有不勝其喜幸者
率爾口占以紀盛集云

一統乾坤大羣生雨露新君王能建極風俗易還淳鄉
飲稽蒼籙天書降紫宸諸侯遵令典嘉讌展芳辰黌舍
簪纓集珍羞俎豆陳主賓儀秩秩僕介色津津椒頌三

陽日芹香泮水春工歌聲律古揚觶獻酬頻聖澤沾羣
品仁風播八垠賜酺無足比置宴詎能倫老我闕中闕
諸公席上珍叨陪聆闕法喜獲坐連茵引領瞻西日傾
心拱北辰知恩無以報三祝效封人

謝董明府惠炭

范叔寒多正不禁烏薪重惠比烏金賒來脫粟方炊飯
留得焦桐好製琴環堵一龕春盎盎麗譙三鼓夜沉沉
硯池雲起龍香暖寫我梅花鐵石心

雨中懷秦主簿

東門之東西市西人家屋頭啼竹雞新年十日九風雨
二老幾時堪杖藜

懷儲教授

鎬京春宴醉簪花步出都門駕小車七里八岡山店夜
一攬風雨宿誰家

次韻言懷

親朋淪落盡故國似他邦矮柱龜頭舍踈櫺蚌殼牕鵲

聲簷外喜鸞影鏡中雙兒女俱婚嫁逃禪笑老龐

二

江海飄零客煙塵二十秋
逝將諸犬子歸老此菟裘
夜雪圍爐坐春風秉燭遊
樵漁時共醉何異宴瀛洲

三

老我龜藏六無毛可作龜
耽詩閑未得強酒醉當先
茅宇城闌外梅花臘日前
幸逢賢郡守鄉飲禮高年

四

短日經南陸嚴寒鼓朔風遍懷知己友長覓寄書鴻世
態今如此人心古不同青天如可問飛步躡長虹

五

風冷柴門閉齋居縮似蝸小橋平陸里識字老農家野
飯常留客村醪頗勝茶早梅溪上折斜挿膽瓶華

六

貧居家事少客去跋奚閑茅屋牽蘿補蘭堦擇草刪雪
添南浦水雲暗北牕山孰謂寒如許雞鳴客度關

七

自分馮唐老誰憐范叔寒婆娑鳩在杖蕭散鵑為冠夢
筆才華減談經喘息殘昨來初度日淚落酒盃酸

八

神仙無足信何藥可延年素行多違俗丹心不愧天座
留談笑客門泊往來船吟雪誰相似襄陽孟浩然

送秦宜仲主簿之京

丈夫不灑離別淚盃酒聊發玲瓏歌黃楊閏餘歲已久

紅杏日邊春正多子瞻手攜鐵拄杖太白足上金鑾坡
鳳臺佳景必重賦千萬寄詩來薜蘿

送主上人兵後尋叔歸臨江侍養

青年未焚紫羅囊竹林之遊鵷鳳翔一旦身為苾蒭草
半間屋住菩提場安知兵甲滿天地遂令叔姪成參商
桑田即變家亦毀蒲屨欲織親俱亡某山某水總淪沒
曰祖曰禰誰蒸嘗象龍駕法力雖猛豺獺報本情難忘
崎嶇行脚求從父殷勤稽首祈空王護身符出虎牢險

忍辱鎧染狼煙黃長洲茂苑久爭戰殘山剩水方淒涼
相逢不覺開口笑差喜自得安心方行人嗟歎擁長道
畫鷁送將歸故鄉孤雲飛處是玉筍把茅蓋頭猶錦堂
蒲羞可助潢潦薦木瓢共飲曹溪香愚觀諸公發歌詠
力為吾道扶綱常惜哉僧中有此郎疇能為爾加冠裳
於乎疇能為爾加冠裳

次韵袁仲徵見寄并自述

城陰山作讀書堆書畫船從海上回春水泮池芹小摘

秋風老圃菊重栽明時正用凌雲筆清夜還傾酌月杯
百里相忘兩相憶詩筒好寄便鴻來

二

才華減盡姓名低賴有綸竿釣碧溪衰鬢幾莖蓬綴雪
開心一點絮沾泥江山有助詩頻賦朋舊相過酒共攜
金斗城東二三里道傍茅舍似雞棲

借韵寄蔣以愚

江上羣山翠作堆江雲與客共低回黃楊閏後餘無厄

丹桂天高孰為栽飽吃河豚肥似乳醉看江水小如杯
延陵祠墓春申巷我亦拏舟訪古來

借韵寄劉小齋

白練裊輕帽屋低綠陰庭戶瞰清溪詞章落筆如翻水
篆籀藏鋒若印泥一昨論文心共許幾重飛夢手重攜
絕憐鳳穴生雛好已向朝陽碧樹棲

謝許克敬六月惠炭

去年臘月人凍死我亦牛衣眠不起家僮赤脚令采樵

日暮歸來墮雙指德哉古人憐我貧于今暑月遺烏薪
藥爐喜得文武火茶鐺爛煮槍旗春禦寒有脩心膽壯
故態盡除寒乞相山空歲晚雪復來平地不妨深一丈
烏薪熟成霞焰紅藜牀坐我龜巢翁灰中芋栗薦村酒
凍梨面作桃花容齊奴爨蠟自奢侈野人炙背無足比
融融之樂度殘年重賦新詩謝知己

病中蒙董知縣陳縣丞尹主簿枉顧且有白粲
爪酒之惠既而病愈賦此以謝

鳬鳥飛來野老家同僚先後佩飛霞共憐敗絮多生蟲
為問疑盃或飲蛇月俸分將官廩粟朋尊兼餉早秋瓜
相如四壁生光彩試握霜毫荅寵嘉

常郡泮宮詩

猗昔廟學悲燬于兵我侯作之聿觀厥成巍巍素王羣
賢儼如侯殿侯廡豆邇所於師生有廬講道在堂飲社
讀法有程有章我侯戾止若網而綱嘉乃進修戒毋怠
荒宮墻非高丹堊非侈道彌六合聖有遺軌侯揚天休

嘉惠士子士風還淳庶見麟趾

武邑新學詩

邑有孔廟棟橈欲墮舊亦有學濕漏且庠惟邑長式撤
而新之清廟奕奕門廡階墀聖賢明靈陟降在茲黌宇
言言齋有詩書師友講貫朝斯夕斯射則有圖書或臨
池惟林杏壇古音朱絲顧諟廟學治化之基帶澤育我
比迹蒼姬絃歌武城異世同規

襟詩

積陰當玄冬生生機已息陽孽僅毫髮梅花獨先得若
人玩化機於此已深識攀條摘玉蕊吟玩意莫測維復
見天心所慮羣陰逼閉門夫如何君子政惕夕熒熒保
養間由茲見天德

二

山雲忽低徊四郊紛白雨老農荷鋤歸布谷桑間語相
勸一何勤一鳴再三俛老農感禽意豈憚東作苦嘉穀
已盈活尚待明日煦小兒未解事大兒遠服賈農器已

可敵耒耨在梁招入室惟老妻出沒撫髭顚

三

凜秋氣忽微徂暑已云往黃花異凡木所植本因壤
稜稜清霜間誰復見俛仰肅殺一氣中銳氣出其上
強梁固可人傲德母日長

四

志士想邱壑老驥厭長道歸來已低徊但覺青山好
至樂在天倫不必事華藻交歡能幾何及今已衰老

五

至老無脩行善類日以疎生知媿古人宴安夫何如羣
處不念德草草復離居春還有餘興雜花滿郊墟網罟
不能操空羨淵中魚

六

青陽既開動草木方敷榮積雪忽如此豈不害含生大
化無停機生生寧有已人心偶自徂豈不害天理援琴
一鼓之坐致麤穢除吾分一天地積陰夫何如

二月二日漫興

東風吹散社公雨紅白花開爛錦雲時俗喜逢迎富日
老夫羞作送窮文袂衣試著寒猶怯拄杖歸來酒半醺
為問驛橋楊柳樹送人多少去從軍

送安上人歸馬跡山

挿竹山中偶出遊折蘆濠上即歸休踞牀獅子聲方吼
踣蹠龍駒跡尚留華雨六時紛似雪松風五月冷於秋
客來認得南泉斧七十二峰應點頭

禱雨

黃梅落盡雨愆期
太守憂農日皺眉
滂沛一朝隨五馬
四更三點謁叢祠

二

乞雨歸來雨滿天
朝衣兩袖帶香煙
綠莎青笠人如畫
多稼亭中看力田

三

一寸丹衷徹彼蒼
不勞方士篆符章
田家雨足豐年瑞

官舍風清化日長

寄京口俞伯鎮兼簡江教授

飛雲妙墨來前日
聽雨高軒憶妙年
杜曲桑麻幾家在
韋賢父子一經傳
杖藜欲去尋黃鶴
羣茗相攜看杜鵑
竹樹樓臺江總宅
想應新築大江邊

壽董明府

臨汝佳山水
鍾英賦厥初
身為百里宰
腹有五車書
見客無官况
休衙只獨居
壽眉揚喜色
百里拜新除

次韵荅性天之長老

道人踞猊牀眼明如趙州每言西來意爰及東家邱白
首林泉交清風江海秋法幢扶欲起法鼓鳴未休本來
無住著聊爾小淹留鹿眠荒苑內烏啼古城頭天道自
坦夷高堂豈伊優他山石可礪直木枝有樛巴蛇或吞
象鼉鼠能食牛賴有佛目明洞見鬼窟幽萬語歸一點
坐斷聞思修

病中即事

何物青蠅滓玉壺掣韝飢鵲攪鵲雛病軀痛作雷鳴腹
垢面愁添雪滿鬚歌枕卧看殘菊在下牀呼取短筇扶
客來與說塞翁馬笑指蒼天慰老夫

二

天方老我心如鐵誰謂讒人口爍金覆轍始知行路險
移家此去入山深餅無儲粟還沽酒爨有焦桐莫製琴
且喜日來聾兩耳從教蚯蚓作龍吟

九月朔蒙周彥美詹伯遠蘇惟可攜酒轍過城

東草廬時余往潞城田舍次日賦此以贈

老夫一棹尋醫去佳客三人載酒過破屋茅飛鳥豈好
衡門木落雀堪羅交情自古陳雷少世態如今鬼蜮多
醉帽簪花開笑口尚須秋曉過西河

示子

憶年二九歲之吉朝賁闔門驄馬匹柏府遄歸鄂書出
烏雞戀母情所鍾歛翮不附高飛鴻屢閱星霜怨樹風
帶經犁鋤賁壯志欲籙青雲竟顛躓羞與腐草枯木比

東家借燈夜繼日著書泚我潛夫筆數載兀如僧縛律
書成兩鬢秋蓬飛出門復過鍾子期麟膠為續焦桐絲
旁觀方笑鮎上竹吳下風塵驚滿目蕉隍夢成俄失鹿
蒼姬訖籙寶鼎移血流四海誅鯨鯢水魚漏網亦幾希
全家幸爾歸鄉土欲學龐公遠城府骨肉遭逢射弓弩
卧疴兩月悟前非白生虛室春熙熙茹荼味亦甘如飴
朝來坐起沐且櫛炙背茨檐抱雙膝七十八年聊記述

懷吳中行

老我平生頗閱人，惟公知己絕無倫。
別來夢裏常論舊，只說閑中莫厭貧。
湖海氣豪心似鐵，庭闈親老鬢如銀。
遙憐歲晚家居好，魚躍冰池入饌新。

寄熊元修

佳兒發軔之官去，名父居閑味道腴。
詩卷剩添兵後作，酒尊常為客來沽。
江湖結社鷗盟冷，遼海還鄉鶴夢孤。
煙水相望遠相憶，寒雲欲雪畫模糊。

寄武城知縣趙鵬南

雙鳥鳬飛下赤墀一行鴻澤撫黔黎昔賢過化絃歌地
今代重興禮樂時春雨桑麻如杜曲秋風禾稼即邠詩
漿飡氷飲持三尺製錦功成聖主知

寄盧公武魚問殷孝伯安信

憶言雨別去途難喜得雲歸舊谷盤郡乘手揮狐史筆
齋居頭帶鹿皮冠草生林館皆書帶竹老溪園可釣竿
獨念咸陽殷博士有無黃耳報平安

送殷孝伯教諭之咸陽

遠遊自是男兒志特立正當強仕年衣上密縫慈母線
檐頭輕束廣文氊春秋三傳繼絕學畢郢諸生得盛傳
老我也須飛夢去振衣同陟華山巔

護國寺對雨

去年梅熟雨蹉跎豈意今年苦雨多偶食僧廬苔作脯
忍聞田舍麥生蛾山禽滑滑題雙樹檐漏浪浪注九河
往事共論魚腹恨近年平地亦風波

和林韵

黃梅落盡天猶雨
白日晚來風更寒
老去甚慙詩興少
病餘猶喜酒腸寬
舟中自古有敵國
李下從今莫整冠
蒲屋紙窓明似雪
政須僵卧似袁安

送性天之長老兼簡初士元大方厓兩禪伯

方坐天寧古道場
遽辭雲水別河梁
蕭蕭木落山中雨
去去孤蓬漚上霜
白雪調高人寡
和黃花開晚自餘香
南能北秀煩相問
為覓平安第一方

徙居橫山口號

為愛橫山山水清
山前築室小溪濱
老夫枕石看雲卧
兒輩求田候雨畊
古井寒泉龍有宅
孤村夜月犬無聲
廿年兩眼風塵暗
猶喜如今見太平

二

三農閭伍共煙霞
數口清貧第一家
瓦釜煮糜燒榲葉
布裘添絮着蘆花
交遊總覺鄉情好
吟眺偏宜野景賒
不見羽人王百八
浪傳仙井委丹砂

三

清夢尋常繞薜蘿白頭今日此婆娑
牕含風露秋容淨簾捲林霏爽氣多
浮世百年生處樂青山幾度醉時歌
莫愁猛獸藏林樾郡有劉昆必渡河

四

山北山南地盡耕人家祇欠讀書聲
丹楓似我衰顏醉黃鶴如仙瘦骨清
吳越喜逢連歲稔朱陳多續舊姻盟
客來莫厭頻留宿新種梅花好月明

次韵荅袁子英見寄

萬國風塵百戰餘一襟冰雪五車書
朝廷未賜延年杖
鄉里聊乘下澤車
鐵網珊瑚遺渤海
玉峰鸛鶴異伊閭
長門賦直千金貴
詎信相如筆久虛

上臺官

經鋤子為屯田去
罄室翁歸儋石無
八十衰顏頭戴白
一雙昏眼淚含珠
鵲寒空繞無枝
樹烏餒徒生返哺雛
匍匐哀鳴臺下閣
尚期甘雨活焦枯

挽謝天民

細柳營中玉一株狂飈吹折莫春初杜鵑繞樹啼紅血
知爾思歸恨有餘

二

三十青年氣食牛貂蟬未得出兜鍪故園芳草春如海
誰謂王孫不復遊

題鄧九淵縣丞白雲親舍圖

若人自是青雲器方爾浮雲如展驥白雲親舍作畫圖
寓我思親未歸意螺山隱隱雲央央吾家宛在山之陽

西天千里水天碧北堂五月松花涼堂上慈親壽觴舉
堂下諸生綵衣舞賴伊黃耳鮮傳書道我赤心方報主
主恩方報報親恩望免無勞親倚門直待平反歸報喜
却到青山白雲裏

和宜興鄧縣丞出

離墨山前芳草多馬蹄曾此幾經過
圉碑文字無人識
風雨消殘近若何

二

民有歌謠吏不譁村莊兒女簇如花深山處處茶煙暖
小市家家酒旆斜楊柳陰中頻駐馬杜鵑聲裏亦忘家
祇緣報國心殊切更喜流年鬢未華

金牛臺送長史仲楚

清明雨晴花正開折花送客金牛臺金牛遺跡不復見
但見塵埃野馬去復來臺前鶴谿貫洮渴瀕湖綠野平
如席臺後羣山倚大江齊梁故里迷榛棘登高望遠散
離憂超然如見崑崙邱為問堰頭楊柳樹頗嘗見有此

客不五年參贊二千石飲水食檠持三日簿書肯縈游
刃餘白雪詞高人共惜樓船汴流出京口閘官放水蛟
龍吼青苔絕壁為留題名與此臺俱不朽

贈眼醫張嘉甫

重瞳天子真天人擇醫乃得天麒麟金篦不刮眼中膜
家有異藥能通神璇霄沆瀣和玄雪洗滌靈臺煙火熱
刀圭微入阿堵中風卷微雲出明月天顏咫尺頻為喜
白金紫駟恩甚侈豈無太史載冊書繼美倉公上池水

老夫一目雲模糊扶億遠來煩掃除京華道上鬼揶揄
爾詩將比蛇銜珠

贈周實翁

鬢髭如戟氣如虹芳茂山前矍鑠翁可惜一雙青白眼
看雲孤卧北牕風

兒子木蒙恩釋屯種而歸詩以誌喜

老鳥失孤雛噉號鸞臺前鸞鳴徹九關德澤降自天鐵
籠放雛歸渴飲劍井泉井泉非不甘飲之不下咽念我

老病烏肺肝煙火然返哺知幾時骨肉且生全牖戶尚
綢繆羽衣復翩跹衆鳥喜聲集卉木回春妍援毫紀離
合執徐洪武年

吳中行惠方竹杖

往有方竹杖化龍歸混茫吾知龍之靈知我力尚強今
年八十餘舉足勢欲僵一目眇數月白日如昏黃出門
多棘榛况復畏虎狼感君扶持意以杖遠寄將稜稜七
尺觚材拔宛種良孤根斬鐵石老節凌風霜聳叟性惡

圓為爾重激昂氣類喜相得顛危賴能防秋風黃葉村
春雨烏石岡挂我沽酒錢時與遊醉鄉赤藤含赭色青
藜失輝光睹物思故人晤言未渠央

即事

方竹過眉杖單紗墊角巾室中無長物林下一閑人

二

北牖青山近南風朱夏涼草蔬留客飯木榻似僧房

余之死欲速埋素志也今偶得小邱於橫山之

陽竈而甕之余他日蓋棺埋可速矣倚我長櫬
歌以自適

枯蟬脫殼欲化老蠶作繭自纏一笑不拘風水龜藏姑
待天年

二

阮孚着屐未了劉伶荷鍤長隨便作松根糞土也勝兵
前肉籬

次韵陳庠仲見寄

老去衡茅寒到骨
兒能負米慰愁顏
峽舟風打前時覆
塞馬天教此日還
冰雪泠泠龍井水
煙霞隱隱鹿門山
芙蓉湖上鷗波濶
殊勝雕籠鎖白鵬

贈陳谷禪老

市地叢林瓦礫場
法幢扶起破天荒
木魚呼粥鋪禪侶
蔬筍香來八九霜

二

選佛場開金碧區
雲蘿煙樹一塵無
客來會得安心法

莫向江邊更折蘆

三

布金人比獨園多
金色山林作補陀
童子畫沙成佛去
蹄涔豈足擬鯨波

四

庭前栢樹解通禪
洞裏桃花小更妍
媿我梁園詞賦客
髣髴絲風裊煮茶煙

送孫太守奔喪歸濟南

大江之南煙水秋。潏湖船送孫常州。甘棠遺愛召伯去。
黃楊閨餘丁母憂五年組。綬忽衰經四郊。襦袴多歌謳。
兒童騎竹恣相送。父老杖藜爭欲留。孤雲宛在長白外。
清濟如瀉銀潢流。北堂萱草秋寂寂。西風落木寒飕飕。
堂前稽顙薦蘋蓂。頭灑淚沾松楸。誓言永佩阿嬭訓。
酒戒不受傍人咻。蜚英久矣徹斧戣。樂棘暫爾棲林邱。
潁川太守已台鼎。碧山學士皆瀛洲。正須大木成巨室。
豈容野水橫孤舟。君親俱報志願足。几杖却歸封素侯。

送源無竭回金山

龍游堂前獅子牀坐分風月今幾霜千金一壺有妙用
三吳百越聊逢場黃花鬱鬱秋雨爛白雲悠悠江水長
重摩松頂作受記毋令黛色參穹蒼

復愁

茅茨數家黃葉村霏雨一月溪水渾慈鴉種麥日未暝
猛虎下山人閉門

江陰陳漢廣為北平府指揮使司知事隨例免

官

黃金臺上古賢士竹帛垂名世稱美碧油幢下今幙賓
風雲際遇與同倫清冰玉壺炯胸臆鐵箸爐灰妙籌畫
殷勤報國傾寸丹雪花如席不知寒扶搖方展雲鵬翼
翩然退飛隨六鷁且喜高堂慰老親毋勞黃耳寄書頻
澄江如練山如掃金菊芙蓉秋正好人生三樂古難全
熊魚得兼真自天塤篚迭奏壽觴舉綵衣褊蹻膝前舞
富貴故鄉朱買臣風流鑑湖賀季真一經已勝千金產

況有牙籤三萬間應笑龜巢鶴髮翁小兒只作識字農
脫身顛厓猶自喜彈力犁鉏供菽水尚期東壁借餘光
讀我兔園書半箱

重遊虎丘寺

不謁閭丘謁虎丘幅巾藜杖興悠悠飄蕭白髮三千丈
來往青山八十秋寶地近曾為戰壘劍池今復屬禪流
老松知我題詩意也學生公石點頭

過吳門

二千年外興亡事試為吳儂問老天西子曠眉真可醜
東門抉目竟何憊荒臺走鹿巖花笑殘鱸成魚野史傳
買得綠尊堪晚酌且將湖水煮湖鮮

次韵荅姜天定

白首歸來山澤臞山行依舊不須扶十年兵革遺黎少
幾處沙場戰骨枯嬾去效顰隨醜婦安知走甃到浮圖
求詩惟厭雞林賈猶勝門前吏索租

詩筒寄自清秋曉書印封來白絹斜一子幸能歸負米
雙瞳可奈醫生花居貧不病如原憲弔古能文愛李華
何日細論今古事荒村獨樹老夫家

送任叔正歸上海

猗歟子任子唾珠腹琅玕一登龍虎榜即着獬廌冠陞
辭蒙主恩家居奉親歡行囊負祿米歸佩納幽蘭秋月
釣龍江春雲畊鳳山藥室費長房木榻管幼安逍遙烏
皮几神仙紫金丹時為療民瘼於親駐童顏葵心抱忠

赤萊衣舞爛斑樓遲雲林下放浪湖海間訪舊過潏浦
尋幽出吳關退鷁翅方斂盟鷗心共閒樂哉壺中天虛
白泰字寬

送董經歷奔喪歸太原

清風蓮幙諸侯客白雪麻衣喪母還扇枕未能償素志
倚門無復見慈顏四千里外迢迢路一片雲邊莽莽山
只恐鶴書催入覲又隨鷁鷺造朝班

西宿丁堰贈江陰王主簿

五月六月涼如秋昨夕今夕雨不休屋山雷撼黑風起
漕渠水溢黃河流河濱之陶萬夫聚誰其董之暨陽薄
羨墻祇見烏曹碑飲冰食蘗忘情苦老夫擊柝天未明
隔水又聞搏埴聲扁舟興盡不往見惡詩聊寫來時情
夏五之初偕江陰張希聲等過鄒忠公墓即事
口占以寓感慨并用趣郡守張侯弔墓之行

青山門外羊腸路走謁道鄉夫子墓向來滄海變桑田
翁仲漂零竟何處麗牲之碑高十尺顏若銅駝卧荊棘

牧童敲火未足悲正恐瓜分搗衣石使君五馬來何時
摩挲細看黃絹辭五丁一呼為扶起隴頭草木皆光輝
予方與客酌清醑白鶴飛來作人語使君應表鄭公鄉
專美那容孔文舉

代簡張希尹

余生寡諧俗老去得知已晤言固云晚莫逆良可喜聯
翩諸侯客寂寞著書事夜分青藜火晝並烏皮几幾回
論班馬一笑觀亥豕煙雲揮灑外風月吟嘯裏蚶蜆酌

流霞獸爐爇沉水佳哉水調詞清我塵俗耳朱絃聽者
稀白雪和能幾別來懷合簪夢見承倒屣惟林大江邊
瓢卷橫山趾秋風落梧葉甘雨熟菰米相望不三舍相
過堪一葦詩筒繼元白通家猶孔李況與阿戎談亦與
諸任齒尚友古之人厥德薰晉鄙

雨中懷任義甫

十日秋霖未肯晴石尤風作虎嘯聲東門父老應相問
何事龐公也入城

蚌盃

溝南老仙出杯孔奇酌言詢之杯從何來匪兇而觥匪
玉而卮不瑀不鏤不覆不斂謂為蚌耶鷸胡弗持謂為
蛤邪爵奚爾為測海之蠡其殆庶幾老仙笑言子宜背
窺瓦壘之文微蚌而誰水族之秀實生天池昔逢羽人
觀迺朶頤麴蘖為糧華陽同歸轉客我者廿年于茲如
李白氏杯鸚杓鷁醺風酌月朝斯夕斯走亦何幸數從
宴娛百憂俱忘是用作詩

次韵管伯齡見寄

笠澤臞儒比列仙，菊潭秋水解延年。
每懷遠送江頭別，喜得安書鴈足傳。
赤米白鹽瀕海地，香橙紫蟹早霜天。
客來賸說幽居好，日日題詩思湧泉。

二

滄洲舊隱宅江東，白首忘機似海翁。
金菊晚開香淡淡，玉山孤立勢崇通。
家子弟連年別愛客，情懷往日同。
歲晚欲尋安道去，扁舟當趁落湖風。

又

郇公五朵雲天風送來前憐我落巢兒覆盆重見天三
復誦佳句一如飲甘泉金篦刮吾眼華津生我咽重念
謝公險毛骨仍凜然金鑠雖被毀壁歸猶幸全兩鬢雪
飄蕭雙袖風蹢躅寒蛩語音喜秋花笑容妍荅詩報君
知今年勝前年

贈刊字闕士淵

憶昔趙文敏公之寫天下碑鐫字獨稱茅紹之紹之

妙在何許八法靡有秋毫遺嗟哉文敏不同世抱藝如
茅誰品第斬蛟橋下溪水清鐵筆淬來鋒甚銳篆隸真
行章草書銀鈎鐵畫寫璠璣天然筋骨見顏柳假手補
戈真是虞文章太守眼如電語重魚金數稱羨青年正
可為時出山居聽泉何足戀羣公將勒燕然銘中郎要
令傳石經老夫為伊雙眼青鐵筆于今錦有聲

寄盧公武舍人

投老鶴溪垂釣緡遙憐鳳池掌絲綸靴霜待漏朝會早

墨雲染翰詞頭新石麟自是天上物金薤散作人間春
尚須鼓吹振六籍蹴踏班馬追楊荀

送同知陞遷安慶郡太守

郡守坐分金斗月朝靴今滿玉階霜一襟耿耿留遺愛
五馬霏霏被寵光官誥疊承恩渥重御屏新錄姓名香
可憐八十龜巢老尚欲攀轅立道傍

送史宗儒歸省親

北風狼號霰撒菽洮湖白浪高於屋游子扁舟歸省親

行囊賸有新珠玉舟行到家除夕前高堂守歲開長筵
斑衣捧酒為親壽河清復見昇平年相門出相今非昔
文彩風流還籍籍一賦可值千百斤貧似相如未岑寂
窮居我亦四壁空吾兒經鋤壤西東頗將此意問若翁
名教之樂將毋同

寄金華府尹經歷

牧伯方宣化賓僚喜得仁幕中勞贊畫胸次有經綸劇
郡征輸夥清朝紀律新轍魚須救涸尺陂正求伸月湛

雙溪水風生七邑春簿書雖雜還矩矱自持循耿耿存
虛室昭昭對大鈞官成敢小怠德立豈無鄰遠別長相
憶前言敢重陳葑菲如可采薑桂有餘辛白首龍鍾老
滄洲寂寞濱歸鴻如可寄千里見慙慙

送田副使父憂歸

若人自是青雲器九萬扶搖尚垂翅高秋沆瀣生碧霄
搏入詩脾作清氣頻年坐此塵土場纖埃不滓芙蓉裳
豪吟接跡李太白柳金梨雪揚芬芳詩成落筆蛟蛇走

多入雞林賈人手今朝送別毘陵城折盡西門道傍柳
東風雨晴花錦香京華到時春正長上林一枝棲鳳凰
鳳兮鳳兮鳴朝陽

送張常州奉旨入覲

白髮田舍翁清曉何跚跚送侯赴朝覲扳轅吐哀丹去
年穀半熟藜藿度歲寒春來理農務豈憚稼穡難采薪
供陶冶四境空榛菅執柯涉重湖荆南斫青山非無犁
鋤具靡暇畎畝間烏曹事未已綠野多荒閑願侯念冰

卷五
兢為民徹天關樵斧暫容息農晦力可殫民歌岐麥秀
侯策五馬還古今兩張堪並載青史看

送王起東御史丁憂起復赴京

君親恩重生當報忠孝情移義與俱冠豸威名傳舊日
攀龍寵渥拜新除玉階雲集來儀鳳錫谷人稱返哺鳥
折盡驛橋飛絮柳親朋相送喜何如

送陶孝思赴名

夙學多才思崇文際盛時鶴書騰日下鵬奮出天池發

輟青雲路承恩白玉墀泥塗龜曳久阿閣鳳巢宜繩準
持三尺絲毫畏四知佩韋遵古訓介石蹈良規比德雲
輝草同誠向日葵往哉行所學動必慎其儀器作璫璵
美文成黼黻奇遺芳留汗竹無負故人期

張知府命子送祖考墓碑還鄉

名門父子傳一經儼如韋相有玄成從親宦遊養親志
念祖喜蒙封贈榮潛德幽光恐磨滅伐石南山鐫墓碣
宋公文章踵韓柳史公清書追褚薛龜趺螭首重摩挲

舟車載去勝橐駝四千里外薄炎海佳城埋玉山嵯峨
墓前翁仲看石立面帶煙霞含喜色九原精魂斯焜煌
百世雲初並輝赫八月九月秋風清綵衣翩跹趨鯉庭
悅親細說鄉里情老夫亦來堂下聽

和賈教授懷鄉

試看一簣可為山千里程從跬步間取印正須金斗大
還家未入玉門關泮芹過雨香堪摘壇杏無風意共閑
我欲中秋聽琴去扁舟艤棹後河灣

寄賈教授相期詣鄒墳祭掃

題詩郡圃景鄒亭澆酒林莊下馬陵白草西風秋莽莽
青山北郭路登登柱頭且看誰為鶴驥尾何慙我附蠅
坐待秋涼行有日老夫扶憊策烏藤

道鄉祠堂詩送張縣丞

道鄉祠前松柏蒼清氣凜然知幾霜伏蒲一疏吐肝膽
汗竹千古傳芬芳此去長安日月近且喜高秋風雨涼
立朝願學子鄒子他年便作知恩堂

題許別駕雪山圖

南山雲起連北山樂天賦詩心共閒東山月出照赤壁
子瞻倚歌情甚適今公畫圖誦雪峰託興應與雲月同
瑤林玉樹絕纖滓蓬婆城外山相侶羣邱角立白龍堆
飢寒喜無桃與哀蹇驢滑澁山前去絕似灞橋人覓句
公餘展卷巖電流襟懷化作冰壺秋楊家冰山無足倚
何如坐對茲山隱烏几

同友人祭鄒墓各賦詩一首

先生高塚麒麟卧令子我冠獬廌威汚玉青蠅除穢跡
銜書紫鳳賜恩輝八千里外甘泉竭三百年來世澤微
瀉我一盃寒澗淥卧碑扶起立斜暉

送楊通判知蘇州府

延陵父老攀轅別吳郡兒童跨竹迎

關

秩遷藩府重恩榮五湖秋水清堪比三壤遺風俗易成
遙望虎丘山下月餘光還可到柴荆

寄張熙載問疾

溝南隱者敦同姓每說相知見肺肝名似項斯詩句好
身如沈約帶圍寬一江雪浪潮平岸十日秋霖雨作寒
珍重齋居足怡悅玉枝無汗竹平安

和賈教授詠懷

兩袖西風獨倚樓一天秋色斷虹收水村霜落紅于染
山色煙嵐翠欲流眼底看來興廢事胸中銷盡古今愁
莫嫌苜蓿盤無味喜有葡萄酒可篋

重九次韻


石潭無菊比南陽老我三千白髮長九日正須多買酒
一錢何必用看囊自憐身健菜萸紫更喜盤餘苜蓿香
早起東牕挂吟笏坐看紅日上扶桑

又和寄秦宜中

高堂燕客似高陽醉筆題詩興味長戀戀多情舊紗帽
滔滔無底老書囊銀瓶萸酒觥船滿玉杵橙齏蟬斗香
應笑陶潛空抱菊西風繞屋叫枯桑

贈辛林甫

有客有客雙眼青婁江山水鍾其靈十年足不出戶庭
手披韋編不暫停案頭照盡練囊螢先天後天見日星
百家喧囂無足聆九師亦以蠡測溟著策之妙窮杳冥
語人吉凶影隨形滿庭書帶生香馨一簾秋色風泠泠
去年抱琴來野亭古操為我作水伶吾方采樵如負苓
相與劇談洗心經呼吸沆瀣食楚萍一掃世味羶與腥
有時醉我蘆花汀客來買卦呼不醒惜哉孤鳳五色翎
翩翹何日儀虞庭鳳兮鳳兮請試聽黃河水清三千齡



龜巢稿卷五

欽定四庫全書

集部
龜巢稿卷六

詳校官監察御史臣劉湄

中書臣劉源溥覆勘

總校官知縣臣楊懋珩

校對官主事臣陳文樞

謄錄監生臣張元愷

欽定四庫全書

龜巢稿卷六

元 謝應芳 撰

記

瑞竹軒記

余辟地甫里與徑山壽上人為方外交一日過余曰今年春吾祖如山翁燕居之所插竹為酴醾屏閱數日竹皆復活或者以瑞稱之故名其軒曰瑞竹敢請子為吾翁記之既而復延致竹所相與撫玩曰是竹也前為屏

時屈其所天至是乃盡釋其縛屈者伸抑者揚拘者縱
新者開穉葉發乎蒼幹勁節之間生意藹如有不可得
而闕者愚乃退而思之夫竹非蒲葦等易生之物可不
根而植者今若此果何祥耶嘗聞往者寇萊公挿竹而生
世謂公忠義所感如山之竹亦必有所感而致然乎余
來吳中聞翁有微德之事二焉屬歲飢饉里有窮乏則
周之俗多戲畋忍物暴殄恒賈而放斯二者固尋常有
力之家能為之豈其一念之誠仁發于中默契于天而

獨有此休徵歟抑別有陰德人所不知歟誠如是則萊公之竹不能專美於昔矣雖然物之瑞未若人之瑞也嗣法之徒森如立竹有能虛心以受道秉節以植德清風孤標為上根器則其為瑞又豈此君可同日語吁人為物靈氣化尤速某即拭目以俟

龜巢記

至正丙申春余辟地渴上依舊識里翁劉氏家築室一區棲婦子差可容膝既而以龜巢顏之客或過余曰龜

亦何嘗有巢哉予曰子不聞乎千歲之龜巢於蓮葉蓋其以葉為巢初不費經營之力也顧予此室實類之儼地里翁地不論值假力鄰伍力不受傭鳩工材則有鄉邑諸友人相之故其室不勞而成今也閉門縮首帖然如藏穴之龜蟄乎其間此龜巢之所以名也比數日來春和景明氛埃寢息四境之內桴鼓不驚田夫野老相與招致涉桑苧之園過桃李之蹊瓦盆濁醪歌舞酌酢逍遙徜徉又得如曳尾泥塗者此雖巢外之樂亦因巢

而得也但不能噓吸道引如龜永年苟於此偷生亂離
免禍鋒鏑全要領以終其壽考志願足矣若夫明休咎
斷吉凶決大疑於國家浮洛出書為太平文明之瑞則
同類之中自有脩四靈相斯世者區區巢居之樂與坎
井醯羹同乎一天不知大小之闕為何如客曰有是哉
子之適意也而今而後吾亦欲從子之居以適其適可
乎予曰可客喜而去予因次對客之語用為記

龜巢後記

是歲八月之初天兵自西州來者火四郊而食其人吾之龜巢與先舊宅俱燼矣予乃船妻子間行而東過橫山竄無錫期月之間屢瀕於危當是時跼伏蓬底屏息若支牀者然猶數數引頸回顧以戀其故土明年仲秋至婁江東近於海潮風沙雨漂搖棲苴久之遂舍之從人借屋而寓閱四年居凡五徙聞鄉邑無噍類以是同室之人幸若再生雖貧窶不以為苦且復以為樂也至吾之所樂則又以窮居無事得專心讀古聖賢書以廣

其志仰天不愧俯地不忤廓如也然視此大塊吾生若
浮與夫龜浮蓮葉者何異所至以龜巢名室雖偏仄心
有餘裕蓋不以棟宇為巢而以天地為巢也峻宇雕牆
莫知其光華門圭竇莫知其陋但知此巢自開闢以來
歷數千億載不壞吾與萬物同居其間正不必藩籬町
畦以自局也以是而觀區區舊巢墮甑奚恤雖物之巢
居者衆矣擬龜之巢先後固異龜則擬其靈耳若曰以
靈自燃亦其用於世者然也世不我用吾生自全吁用

不用全不全繫造物者處之如何非龜所能為也惟兩
間之巢人莫能壞此吾心可恃而安者吾心既安何往
不樂第恐不知者謂無巢而有名疑為誕故重託毛穎
氏告之

雲半間記

歲庚子月閏五西山師構小閣於天慧莊而居之額曰
雲半間蓋取諸前輩詩中語也予時客天慧與師落成
徘徊其上溪山煙樹四顧如畫人皆喜之愛之而師之

所樂不在是也是屋僅一間而止高不倍尋廣不踰丈
無檣櫨染稅之華自常人觀之井幹麗譙奚啻霄壤師
獨處之裕如盖其前後左右牖戶虛爽蒲圃木榻薰爐
禪几之外無長物焉師於六時坐如泥塑諸弟子瓜華
之供日一二至談說有或從侍立客或至信信宿宿皆
不能常與師共之惟英英之雲悠悠而來朝於斯夕於
斯窮歲月於斯一榻之外皆雲攸居言半間者亦謙辭
耳夫雲之為物本來無心而吾師心無所住是亦無心

人也以無心之人遇無心之物故不情而親不契而合
久之則雲忘其雲雲即我也我忘為我我即雲也吾視
吾室亦不知其與天地相間孰為大孰為小也莊周云
天下莫大乎秋毫之末而泰山為小其言殆庶幾乎雖
然諸皆相忘吾師固知之久矣然而猶自此室者抑亦
云桑下一宿之意與予嘗以斯言質之師曰然遂為記

歸耘軒記

吾友徐君伯樞以兵後還無錫故里築室膠山署曰歸

耘徵予文記之予嘗質之曰而翁太中公為時名卿今
逝矣州大夫廉君之才能也其家方薦之省府將上聞
以官之而暇耘其田乎伯樞笑而不荅予退而思之君
名父之子自蚤歲淑諸師友菑畬經訓垂二十年今以
先世負郭之田莽為荆榛固不可不畊且耘也然亦奚
忍舉此而廢彼耶必也帶經犁鋤斯可矣古之人若耕
莘者樂堯舜之道耕南陽者有梁父之吟故一旦以
三聘三顧之而起非惟澤溉生民功施社稷焜耀當世

而伊訓諸篇出師兩表至今與日月爭光是豈專于農者能之乎雖然耘田之事亦有治道存焉敢請與伯樞論之五穀猶良民也稂莠之屬猶凶頑也草生而不耘則穀不穀矣芸之早則用力寡而功多小緩則小害大緩則大害既害而耘或百倍其力而不盡雖去之而穀已疾其害矣吁草害于穀治田者道也凶頑之害良民治人者可逃其責乎惟沮溺荷篠之流潔身亂倫者不足以及語此伯樞宜留意焉樞聞乃起而謝曰是吾志也

請書之用誌於壁庶他日知所警云

東郭草堂記

至正乙巳春友人徐君仲剛書來曰瑗性迂拙分甘退
藏擇無錫東郊荒僻之地作草堂居之讀書灌園蝸休蟻
適自謂有可樂者子知我其能為我記之乎予惟仲剛
卓犖之士也譬之梗枿豫章不巨室棟柱則山林而已
比嘗佐令慈溪方欲挾吏弊更苛政以仁其民一旦以
當路掣肘棄若敝屣翻然來歸客吳下數年不入城府

其抱負為何如哉茲草堂居寬閑之野前有鵝津可釣
可游鴻山宛山屏列左右東膠西堠紫翠相接又皆牕
戶間天然圖畫也仲剛入則與書中聖賢相對出則與
里中農圃為伍親友時至忘形爾汝腰不為督郵而折
膝不為汾陽而屈適興賦詩往往有太白豪放所謂有
可樂者其以是與雖然昔諸葛孔明居南陽亦蕭然草
廬而已及乎以三顧而出八陣有圖出師有表而勲業
焯焯如是靜學之功信不誣矣荒僻之居又安知非天

假為學之地乎愚請以規仲剛并記斯堂之歲月云

野人居記

余聞之易其地則齊楚異音同其居則蘭鮑俱化大哉
居乎故君子必慎其擇也予友吳中行今乃去朝市遠
城郭挈家淞江之濱桑麻之野蕭然一室名野人居是
果奚擇而取哉昔中行以劍術游諸侯借箸之籌幕中
之辨嘗見用於當世豪傑矣未幾以時之不利投簪來
歸回視淮陰狗烹之歎華亭鶴唳之悲銅山餓死之辱

金塢燃臍之禍未嘗不愴然于懷其言曰窮居之安不
愈於負且乘乎蔬食之樂不優於覆公餗乎由是縮首
閉門百念灰冷獨研精古聖賢醫藥之書以事其親以
濟夫人暇日則携杖屨往來溪山間與蟲穴吟嘯者游
耕蓑釣笠交亦無間情真而不邊幅語朴而無貝錦滄
洲濯足或坐終日茅檐炙背或談千古桃花流水之外
杳不知其孰為秦而孰為晉也但知譚泉飲菊可以永
其親之年江鮮膾鱸可以美其親之饕瓜疇芋區芝田

藥圃皆其地所有而名都大邑之所無也若中行可謂
善擇其居矣予與中行有通家之好一日携兒子林過
之用是為乃翁壽中行嘉予言請以為記因命林執筆
以書其居之壁云

雪洲記

趙君執中蘇人也家笠澤之陰與天隨子故里相望澱
湖直其東陳湖橫其西其墟落乃一洲渚耳君性喜雪
凡歲寒雪作之日天地六合炯如冰壺三江五湖如瑯

匣玉杯而山林皆瑤草琪樹也然陽精掩耀湯泉欲冰
歌黃竹而悲者在在有時君獨傲兀吟笑于滄洲之
上或終日竟夕而忘歸焉蓋一時清氣與虛室之白洞
然無間故自謂平生慶快無踰此時乃即其所居之處
所樂之事自號為雪洲也予嘗於夏日過之階庭之間
竹有蒼雪明牕素几寂無纖塵而大篇短章又皆與冰
柱雪車同一光潔且曰柳雪之春蘆雪之秋亦猶見似
人而喜予於是知雪洲之樂蓋無時而不自得也或曰

以君之才宜其從名王遊兔園而其遇出奇謀平蔡州而樂其成功窮居野處何足快哉吁昔子程子論顏子之樂非樂簞瓢陋巷也君之雪洲亦類是歟但區區言耄不能揄揚姑述其槩并以解或人之嘲如此云

竹梧書房記

洪武辛亥予去家十有八年而歸儒紳故交多無噍類獨友人秦公宜仲主貴池縣簿告老于家予首訪之與客偕往公所居環堵之外皆焦墟灌莽乃題其室曰竹

梧書房客因訝而問焉予曰嘻我知之矣公之先君子
以多資弘第宅儲書數千卷自蚤歲教公為舉子業公
研精伏生所傳之書旁通百家文譽日著時子山陳先
生未魁天下與公為忘年交嘗與予過之其階庭之間
巨竹數百雙梧玉立綠陰蒼雪清氣襲人而公之風神
蕭灑殆若與竹梧俱化子山嘉之故有是篇夫高垣大
宅今瓦礫也碧梧翠竹今枳棘也垂籤挿架之帙不為
劫灰則市肆之醬蒙矣惟腹笥之書幸而無恙故嘗為

郡博士以教其邦又推其緒餘佐治巖邑以嘉惠其黎
首令老矣尚能鳴待問之鐘以接遠方朋來之士為文
章則駸乎周誥殷盤而不聲牙也扁乃舊名蓋不忘
父兄師友淵源之懿耳客既釋然公亦領首出縑素請
筆前語以告後之不吾知者并以示諸子若孫庶箕裘
其業云是冬月建子日幾望余則龜巢老人謝某也

映雪齋記

毗陵何士信起家業儒儲書數百帙研精誦讀晝夜不

息榜其室曰映雪齋蓋慕孫康氏之苦學焉夫以士信
之家居市廛足資用焚膏繼晷乃所優為齋居豈虛名
哉其心必曰我自短檠猶雪之明我室非几猶雪之瑩
我讀我書夜氣以澄微言妙理披雪覩星顧我靈臺皦
皦乎不雪而白不冰而清唾視羸金珍惜分陰曾不知
九遠塵土之蓬勃四時寒燠之變更然則映雪二字又
何異湯盤九字之銘歟彼灞橋詩人梁園賦客有不可
與同日語者惟篤志之士如游如楊立雪於當代程夫

子之門者聞之必予其進矣士信謁予文請以是勵之

蘿屋記

毗陵郡城之西南距太湖廿有餘里湖水交流北抵城而匯其地有高原平林風篁煙樹景物瀟灑友人詹伯遠居之茨宇一區牽蘿補葺區曰蘿屋名固不虛蓋亦以昭其儉耳然庭戶閒如日必灑掃木榻棊几瑩無纖塵平居則肅然孤立以孔孟之書教孫共讀異端邪說絕口不談彼流俗相煽而炫惑者弗接勝友時至尊姐

款洽或相與論端人貞士氣義風節終日竟夕疊疊不厭予嘗過而問曰子豈掃除一室之小大夫乎伯遠笑而不荅予曰噫我知之矣伯遠通古今明物理眎昔人之銅山金塢皆禍基也峻宇雕牆匪安宅矣蓋其所喜者桑樞甕牖之美而所樂者簞瓢陋巷之天儼然為草廬布衣而耕南陽之田者其出處豈易與人言哉雖使得志其不為堂堂九仞也必矣善觀人者毋以蘿屋之儉而陋諸洪武十有二年歲在己未四月之吉謝某記

菊軒記

古者達觀之士寓物適意初未嘗肆意於外物也若莊
周觀魚支遁觀馬阮孚自蠅之屐嵇康柳下之鍛與夫
愛竹愛松愛諸花卉者大率皆適意而已近世流俗以
淵明愛菊亦從而愛之所植或百數十株高及尋仞花
大如杯假以花師接養之工移易種類使坤裳正色亦
多變而失真其嬌紅韻白紫茜紺碧之屬愈出愈奇且
復以西子玉環等人物之名名之是則誇多鬬美肆意

以極玩好之娛視淵明奚翅霄壤夫東籬之菊猶西山之薇薄言采之可以樂饑若乃賦離騷而飡落英者其庶幾乎寒圃晚香樂則樂矣然其趣有不可同日語者吁流俗之謬如前所云豈不大可笑乎吾友王壽翁以菊軒徵予文予恐其翫好之意淪於汙俗兩年不為措一辭今乃不然翁春秋七十有三凡早歲華靡之習皆已絕去軒墀執菊僅一二本其言曰吾所以愛此者嘉其當草木變衰之候霜瓣露葉澹然幽芬挺挺特立久

而不墜殆與晚年矍鑠者默有契焉故朝斯夕斯逍遙
相羊或開牕坐宴或置酒連客終日相對不厭不倦雖高
風雅致不敢妄擬於陶其適意之樂亦無官之韓魏公
也咄彼庸儒朋淫可憎安得疾惡如諸伯厚者相與御
剛風搏沆瀣周流八極為茲花一洗污穢之辱過翁幽
軒呼酒高酌咏柴桑之詩歌離騷之章盡醉以適翁之
適而吾亦得以適其適也矢心陳詞用誌軒壁為後會
張本云

斗室記

自標枝巢穴之世遠宮室之制日新月盛世祿之家第有甲乙馴致習俗之侈而堂高數仞牆屋錦繡者比比矣若夫屈身矮屋之士往往以力所不足不能有為其志未嘗不澹然也惟吾可積則不然可積以吳越錢氏之裔贅延安唐侯之家往來雲間築室采邑鳳山屏其前淞水襟帶其左右屋裁三楹高不過尋丈而延袤深廣如之廬曰斗室時僑寓以居宴如也夫以婦家封侯

之貴采邑之富雖連雲別關咄嗟可成今若此亦可謂
不淫於富貴者歟吾將以其細行觀之屢歲過鄉里視
故舊親戚謙謙乎抑抑乎執子弟禮不異童丱之日無
一毫驕矜放肆以加於人故咸謂有先君子好禮之遺
風焉然則斗室之儉本乎天性非矯飾一時以要虛譽
而為之也昔衛公子荆善居室完曰苟完美曰苟美故
孔子稱之若可積之儉而約於衛荆其庶幾乎吾用是
以稱可積延安家法之足稱亦可見矣是為記

思齋記

膠東賈文學鈞慶典教毘陵郡以燕處之堂榜曰思齋
徵予文記之且言曰某所謂思者非謂能三思而行亦
非敢以九思之訓待旦之意示警如書紳也思吾親於
疇昔喪亂之秋相繼即世母最昌邑父聖萊縣幾致蕪
沒幸而茅寇殄滅歸室祖塋大明開天拔擢寒畯代畊
有祿而養弗及親矣風木之憾十有餘年去鄉土幾千
餘里霜露降濡悲感交集念欲灑飯松邱使吾親不為

若教之鬼棲息桑梓以終餘年此朝夕耿耿於懷也予
曰嘻游子悲故鄉信矣況思親乎然君子之思其親者
豈止是哉烏雛返哺豺獺報本特一事耳必也出言舉
足動合矩度不忘其親詩禮之訓聽于無聲思無邪以
正其心儼若思以敬其遺體由是而推其緒餘以淑諸
人以施諸行事忠君報國流芳汗青以顯榮其親夫然
後息負荷之肩解組綬之縛訪親戚省墳墓某水某邱
凡吾親所釣游處吾得釣而游焉鵬冠鳩杖抱子弄孫

以安享太平田疇之樂則今日之所思者豈不能魚鱸得乎區區耄言筆識齋壁庶或紓其懷抱云

白雲亭記

東漢趙邠卿壽藏之作吾意其涉艱危將以得全歸為喜故耳至唐司空表聖乃預為壙槨時與客觴咏其中又作休休亭以寓超然物外之意史稱曠達不誣矣今吾友唐公均舉由末致仕佚老於家洪武革命蒙天愍遺以弓裘無嗣業者命其兄之子某允明為後家事鉅

細悉付托之即在家為有髮僧叅釋門諸老以學其學
春秋八十有九號曰白雲翁距舍南百餘步迺為佳城
傍結茅龕晝夜禪寐允明則日候起居奉甘軟如事所
生且能承順其志築亭于前復鑿池以藝蓮芡之屬幽
花秀竹與冢上之木參錯相映每邀致親之所愛盍簪
于亭薰爐茗椀相樂也且曰某負米四方往往望白雲思
親有如昔人之言者雖歸侍旁雲常在目請先生為我
記之時坐客有辯之者曰吾聞藥山禪師以雪之在天

為西來祖意今雲翁禪眼之明必有契乎禪悟之語非
允明名亭之意亦非儒紳先生所知也予曰不然夫英
英之雲一也其觀感各有不同雲翁身如雲浮太空貌
焉斯須猶瞿曇氏電露之諭也若夫允明望親舍之雲
而懸懸者是則以梁公之心為心家居以壘雲自怡庸
詎知非華陽真逸之心乎吁仁見謂仁知見謂知予所
知者此理而已禪則吾不知也客笑而不言予曰如何
翁曰佳允明曰唯唯是為記

養正齋記

往余客東吳十有餘年聞儒林月旦以琴川高彥和氏稱
為儒士聲甚藉藉予雖未相識而相慕焉洪武辛酉秋
友人楊純夫尤稱譽之且言彥和以養正名齋蓋取蒙
卦之辭猥徵予言屢辭弗獲予曰大哉易也豈敢以管
窺之見以贅疣乎請以古之善養正者為彥和誦之如
孟母三遷使其子去丘墓市廛為不遊之地習禮容籩
豆于嬉戲之間如室於蘭久而俱化厥後以寡欲養心

以直養氣傳正學而接跡于子思辟異端而竝功于禹
是母是子非善養者能如是乎衛武公行年九十有五
懿戒之作既自箴警且求卿大夫官師之屬交相教戒
瞽矇誦讚朝夕弗違言行之純罔有圭玷亦豈非善養
者乎是故一為亞聖一為睿聖易之所謂聖功者不誣
矣吁人生天地間所受之性本無邪僻惟其情竇既開
牽於物欲日浸月漬或正或否遂乃有君子小人之分
苟得其養則如木從繩其正若自然矣今彥和之為端

士也蒙養之功不言可知繼自今以來學與日積道隨
年長佩服乎七篇之書涵養乎大雅之章毋曲學毋枉
道毋有獲而詭偽慎終如始益進益修如此則希孟而
孟希武而武何止如旦評而已哉區區言耄而瞽幸純
夫為我謝之

重建雲居菴記

洪武十有六年春雲居主僧德傳過予曰宋咸淳間四
世祖諱行興號祖庭來自天目山駐錫爵林露坐說法

風動一方緇素與檀施全集遂結菴以處之名曰雲居
由宋而元祖年九十有二終于至正乙酉其嗣法弟子
曰慧滿繼之四年而沒曰道印以甲乙傳及元末菴燬
於兵慧滿避兵他適不知所之而德傳念祖師過化之
地義不忍捨去大明更化初賴吾佛之道與時偕行于
是剪荆榛畚瓦礫復經始營之距爵林百餘步得里人
湯達卿故基以廣其居今苟完矣請先生之筆以識之
前此予嘗過橫山之陰憩足于菴觀夫所築之室凡二

十餘楹堂有佛像設供具鐘磬列焉僧有室經案禪榻
香燈備焉餘如齋廚井湑之屬罔有不備其地近山而
爽塏遠城郭而幽閒晨嵐夕霏空翠灑牕戶間無囂塵
市聲滓人耳目傳公日掩關趺坐泊如也吁是雖最爾
一區如把茅蓋頭然視佛之所謂桑下一宿者亦已多
矣彼名山巨剎膏腴以千萬計尸素之士或不能及若
傳公者服勤如此肯構如此繩祖武而繼之人如此豈
非浮圖氏子孫之象賢者歟予故聽其所謂并以目見

之實三嘆而書之是歲夏六月之望同郡龜巢老人謝某撰

歸耕記

予老廢筆耕授之子子以拙辭躬稼又弗克服勤方諄諄然勗之以周公無逸之訓潞城曹德聲書來曰震往者避兵東吳顛沛萬狀還鄉以來田舍粗葺歸耕二字揭諸座隅示不忘也惟巢翁姻婭而相知敢請識其顛末以垂警其後人予曰嘻前元時德聲曾大父為晉陵

閭石大父起家登仕版歷官至東平路同知歿數年而德聲失怙丁時多艱家用蕩析蔑有能相顧者藐焉依母氏笠澤之濱狼煙滿眼矢石塞路窮途之困甚于疾藜杳不知先業失墜為何如也大明更化初竭蹶而趨偕女弟之家還故里荷蓑笠操耒耜薙荆棘之區犁之剗瓦礫之場屋之載構載穫粗理而恢拓之烝嘗之奉滫瀡之養征徭賦稅之所需罔有不給且能割膏腴以寧二兄之歸斷鴈復得以成行遊魚不失其同隊東阡

西陌雞鳴狗吠桑梓敬共是如其素願也然則患難之餘歸耕有如此者豈易得哉若曰其歸也非衣錦之榮休官之適其耕也非能以堯舜之道樂于畎畝此蓋以前賢論之衆人可同日語乎如德聲者先世之業失而復得骨肉之親散而復聚況時和歲豐率土寧謐凡我同類皆得耕田鑿井驩然為太平之民其樂雖異于古人未為無所樂也吁以其艱難勤苦十有餘年而後得此後之人或罔有攸知寧無怠荒乎此記之所以作也

顧予年耄請復以語吾兒者語之夫周公聖人也無逸一書為世龜鑑苟知之則當尊其所聞俛焉孜孜以述纘承其先緒詩曰子子孫孫弗替引之吾於此亦云

書屋記

洪武壬戌秋崑山故交辛斌甫過龜巢為其友蔣生秉彛請書屋記且曰生自齠齔時嗜學雖祁寒大暑矻矻不少廢年十五父命學吏事閱數月不懌而歸既而令服賈走淮浙南北數千里亦常以簡冊自隨少暇輒誦

讀之竟不屑罔市利以肥其家遂令力穡為仰事俯育計秉彛廼從親之令臺笠緇撮以事其事三餘之日愈進厥功老夫以未嘗面其人目其居難乎架空鑿虛而為之文也明年夏五予舟過婁江斌甫與生郊迓而過之所謂書屋者初無垂籤萬軸也亦非連雲大宅四書六經外諸古圖史與陶弘毛穎列乎其間與之語粲然有文意吾常林經鉏董君南之朝耕夜讀亦如是而已矣揚子曰晞驥之馬亦驥之乘使秉彛所造愈深進愈

力則所就未易量也然則秉彛能承順其親且不卑屈其志謂非能子可乎所居在崑山城西九里橋之南其江山景物無關於書屋者不書特以其心跡之實書之用為記時洪武十六年五月二十八日

逸菴記

夫人莫不欲四體之逸也惟君子則逸其心故嘗操而存之寡欲以養之秉彛之天一真無偽感而通之動罔不吉周書曰作德心逸日休君子取之故能逸其心也

今河南彭公伯常為武進令自號逸菴夫所謂逸者心
逸之謂歟自常人言之州縣之職其勞甚矣顧茲巨邑
事如絲棼雖戴星出入猶恐不遑可能逸乎予曰不然
公以夙學老成之才為之征科撫字恩威並行雀角鼠
牙曲直能辨如庖丁解牛知其肯綮牛雖多而芒刃不
頓也矧夫至公之心炯如秦鏡且不以塵土蔽妍媸所
照隨物應之則是吾心之逸蓋自若也雖在官舍視為
逸菴不亦可乎一旦朝家以七十之年優容里居則吾

心之逸與肢體之逸熊魚兼得矣雖然古之逸民若夷
惠之儔高風峻節為世師表吁吾知逸菴之逸必如是
而後已焉

持敬齋記

前輩以齋居之名著稱者多矣其最著者曰誠齋簡齋
容齋又有以先正箴銘而傳者曰敬齋求放心齋是也
其後一變曰疏曰酸曰松雪者紛紛然人爭效之齋之
義遠矣今贛之聶伯夔氏以持敬名齋需言于愚愚固

辭不獲乃言曰聖人筆六經以詔萬世敬之一字層見
叠出先儒詳之矣愚復何言竊觀所謂持者意在執持
而用之人之持物猶吾之持敬也持物以手持敬以心
苟不致謹則亦莫之能用也譬射者必謹于持弓而後
不失其中御者必謹于執轡而後不失其馳又如執玉
捧盈必洞洞屬屬然如弗勝如將失之然後能勝而弗
失也伯夔鄉遊成均持此敬以進德脩業故學優而仕
宰高平持此敬以治其民而民有去思焉邇來為諸侯

幕賓翼翼乎以叅贊承宣為務謹三尺御羣吏以涖四
邑是皆持此敬以展其用歷茲以往百司皆然有官守
則持此以共其職有言責則持此以盡其忠我冠冕鳴
佩玉鸞臺鳳閣簪羽鶴鷺無非持此心之敬而用之其
用有不能盡者敬乎敬乎亦豈非一言而可以終身行
之者乎夫如是則上不負天子下不負所學齋名著稱
亦卓然如昔人矣雖然宦成而怠世固有之惟君子慎
終如始有不為其怠者衛武公春秋九十有五官為周

司徒方且再三以敬慎為詩日夜警戒故卒能為衛聖
武公愚不敏敢請獻此詩為持敬慎終之助洪武十七
年歲在甲子三月二十六日

恬澹齋記

為高彥述作

昔有與彥述同姓字君素者以願軒請涪翁賦詩其畧
曰辱莫辱多欲樂莫樂無求旨哉斯言真可為恬澹齋
座右銘也蓋多欲則不能恬靜必辱其身無求則澹泊
自足樂於其心由是知孔顏之樂非樂乎飲水曲肱簞

瓢陋巷而蔗境之佳可漸入而得矣夫彥述先君子以
醫名家獨步鄉國流風遺俗今豈無之十餘年來乃能
與時浮沉不競不躁不貪不墨舊家氣習掃滌淨盡故
齋居之室題曰恬澹蓋取諸內經養生之要旁叅老莊
而有得焉至如諸子百家之書亦能涉獵然文漆不露
不求人知城居如子真谷口賣藥如君平賣卜簾常晝
垂門或早閉衣布素若紉綺茹麕糲如膏粱由其氣稟
之清資以學力斯恬澹有過人者每謂人曰人生固不

能無欲也多欲奚為彼銅山鑄錢郿塢積金一姬傾斛
珠萬馬如錦繡凡如此類孰不禍賈當時而遺臭後世
乎言之必撫掌大笑傾倒而後已吁黃太史九原可作
論二高當有抑揚老夫贅言亦庶幾獎勸之助云

芸室記

予耄無能為者久矣蘄然骨立百念灰冷獨嗜學好友
之心猶未能忘前元故交淪沒殆盡每見後生少年能
讀書通古今識道理且不為異端邪說所惑則愛重之

同郡為忘年友者凡數人其一伯禮也洪武戊辰秋伯
禮書來曰某居鄉城環堵一室有古聖賢經傳及醫書
若干卷日用涉獵間以芸香辟蠹度諸室中顏曰芸室
望先生以警之書再至義不容辭矧予數相往來知其
室無節枕之華無丹碧之飾無屏愚帷幄為觀美之資
宴安之具闕闕中有山林清致木榻棐几圖籍左右薰
爐短檠陶泓毛穎之屬晝夜為伍孜孜厥脩嘗謂人曰
吾為醫家方技可以寓吾心之仁以濟夫人人故先之

非以儒為迂而後之也吁伯禮言此其知道乎然九流
百家莫大于儒儒之道莫大于仁伯禮知醫藥之方或
未知仁之方傳曰已立立人已達達人仁之方也尼山
大聖蓋得夫唐虞三代之傳傳之萬世以康濟斯民非
金匱石函之方可同年而語者請以是筆諸芸室蘊諸
身施諸人則吾心之仁不可勝用醫儒之道所謂並行
而不相悖者信矣是為記

重建清微觀記

夫師教之恩報同君親蓋化之重者見于經昭昭也然
道德五千言此非所先苟師道之不降則道德亦不能
有傳矣今清微觀主周鍊師石泉勤而行之是能默契
禮經而獨超乎其類也洪武己巳春石泉書來謂予曰
某追懷先師歸復故業丐先生為文識之予嘉其能而
不却也抑嘗過丹陽聞諸鄉老之言其報師之恩藹然
可見初邑人諸葛德齋隱居學道佩天師符命叔此觀
為脩鍊之所既而羽化實為開山之鼻祖也弟子裴靜

山等住持以甲乙傳元末觀毀衆亦飄散或存或否洪武改元其徒朱竹軒言還結茅而居未幾而終時石泉住丹徒紫府觀聞師訃即謝事而歸墓之志在復業掄揚道法風動一方向化者咸樂施以相之諸葛氏母子其尤也于是剪荆榛畚瓦礫鳩工度材辛勤十有餘年作三清殿前闢山門傍翼兩廡祖祠經室丹房齋厨之屬凡若干楹穹林竹樹蔚然屏蔽輪奐之光焜煌乎蒙城故區度亭遺跡長塘之煙水湖光北固之雲霞山色

亦皆映帶為清微勝概矣吁凡為人後者有能繼述如此豈不為賢子孫乎近世縫掖之士學必有師禮宜報効未嘗彷彿如此者也予因記其事之顛末深用感慨并書此為世之勸云

棲雲軒記

雲之為物聚散不常其聚也由膚寸之微至於彌六合雨天下其散則斯須無踪人莫能測況能與之棲遲乎惟英英而白悠悠而閒者方外之士相羊似之每寓言

而高尚之意云耳常郡玄妙觀莊某以寧棲雲有軒意蓋
如此夫以寧師老聃其學以清靜為宗青山白雲澹然
幽棲固其宜也然聃在周室柱史有年青牛出關然後
著書五千言以鳴其道亦未嘗絕物斯世而為高尚焉
後之善學者如陶貞白于齊梁之間挂冠都門怡雲句
曲若將終身焉及乎以大任寄之固辭而不可得遂乃
坐山中如廟堂之上茹茯苓如鐘鼎之食人到于今稱
之不失為華陽真逸也矧吾以寧有琴而能作松風之

聲有詩可以賦怡雲之情是則陶之所樂皆為吾有山林市朝或處或出何往而非棲雲之地哉吁由周而來寥寥二千餘年所謂隱居以求其志行義以達其道者竟無其人是可嘆也若夫華山之陳一枕白雲三徵不起此又不可同日語矣以寧徵予文特書此以識歲月以備從善之擇云

聽雪軒記

夫雪聲之微若有若無聽之者必方寸之間一無擾攘

兩耳之聽不為物奪然後可得而聞也同郡馬用和居市廛以陶埴為伍絲竹車馬之喧晝夜不息聽雪有軒豈虛名乎洪武初予嘗忝為東家某知其為氏之良別來十餘年說者謂用和讀書養親習與志長超然出羣遇歲晚同雲霰集而霏霏之雪繼之時用和侍親庭闈言此為豐年之瑞以娛其親捧壽觴如金帳羊羔舞斑衣如仙人鶴氅以春蟲撲牕之聲為金石之鳴舉家之人同得以樂其樂也既退獨處軒居萬籟俱寂乃想像

撒鹽飛絮聽于無聲不啻若鈞天廣樂九奏而有遺音
所樂有未易語諸人者其心必曰蘇子卿十九年牧羝
沙漠李元直夜半擊鵝襲蔡梁園之賦客揮毫灞橋之
詩人覓句皆安知雪之有聲如此其樂哉用和需予文
請以是相知之言識諸軒壁異日黃金鑄我鍾期吾亦
無愧焉爾

瓜田記

農皇古聖神以人道急于養生是故作耒耜教之粒食

又為之醫藥以濟其天關而本草之書出焉既而軒岐問荅靈樞素問與本草並行為醫家之大經大法也崑山邵濟民氏家傳是書深究厥旨為醫巨擘迨元末年業隲於兵慕古之同姓種瓜東陵于是即所居淞澣糞于瓜田臺笠而鋤抱甕而灌綿綿嗉嗉之然如周雅所稱以之養親可以充一味之甘以之留客可以侑一茶之款其蒂為苦口良藥可與參苓薑桂並用以活人濟民嘉之因以瓜田自號朝于斯夕于斯寓幽興于斯非


矜乎東陵華胄也方今盛時過瓜田而納履者無之或
為古之人有白兔御史殆若戲言無足患者其樂為何
如哉予嘗避地東吳濟民久交乃不以我三百廿里為
遠九十六歲為耄致書求文再四益勤予辭不獲遂以
昔所見而知者筆之是為記

習靜軒記

洪武丙寅冬前知武進縣太原舒公之孫文允書來曰
某家居闕小軒讀書強名習靜用唐人詩中語也丐先

生為予識之書凡四至不容以耄辭乃謂之曰人生而
靜天賦之性感物而動情之欲也性至微故學者必有
以養之然後不為物欲之所汨習靜之意必有見於此
歟夫以文允之英姿壯年學優而仕動而有為取青紫
如拾芥今乃韜聲光歛踪跡負米養親之外足不入城
府影不出戶庭目不眩邪色耳不污鄭聲膏粱綺繡不
適乎口體罄室隘巷門可羅雀澹然而資于外者如此
廓乎虛襟寂乎靈臺幽探乎經史之奧涵泳乎義理之

懌出入乎諸子百家而無他岐之惑焉其怡然養乎中者又如此可謂得習靜之方矣昔者濂溪翁主靜之學程伯子以親炙而得之其平居終日坐如泥塑及其動與物接則一團和氣穆如春風視世之以槁木死灰為靜者迥不侔矣愚意周程之學蓋默契夫大學定靜之旨相傳使文允以周程為法而學焉則習與性成二賢同歸豈特如摩詰之語而已哉予不佞故卒以是告之時洪武二十年四月之吉同郡龜巢老人撰



龜巢稿卷六